

IJ VEJ DEL ME PAIS

Testo di Piero Montanaro

Musica di R. Casti – G. Rigo

Consumo 'l temp al sol ij vej del mè pais
Ansetà 'nsima ai mon frust 'd na scala veja.
El sol a rosija l'ultima fiòca, spòrca, 'd fervé.
Ij passaròt ansima ai cop torno canté.

Canto pì nen le canal senza la fiòca
E ij vej del mè pais col sò baston sla tèra a scrivo
E cancelo firme che termolo e ricam anventà
contanda veje stòrie, ma parlanda al passà .

El sol dla fin d'invern a scaoda 'dcò ij cheur e la speransa,
Dà nen fastidi, ansi la penombra a giuta a vardé lontan
E a stermé na lerma 'd nostalgia, d' un curt doman.

El sol dla fin d'invern a l'ha 'l calor panà come la vista
Dij vej setà 'nsima ij scalin frust 'd na scala 'd mon.
Mi i-j vardo e scoto. Vurija ambrasseije tuti e fermé 'l temp.

Con vos stanca a canto ij vej del mè pais,
Ansetà 'nsima ai mon frust 'd na scala veja,
canson d'un temp lontan quasi da tuti desmentia.
Sovens la vos termola e l'emoission fa manché 'l fià.

J'ombre as fan pì longhe e 'l sul l'é quasi andà.
Con le berte 'd lana riche de stòria giù an sl'orie
Ij vej del mè pais a s'aosso lentament an pè
Per cambié pòst e cheuije l'ultim sol ed fervé.

El sol dla fin d'invern a scaoda 'dcò ij cheur e la speransa,
dà nen fastidi, ansi la penombra a giuta a vardé lontan
e a stermé na lerma 'd nostalgia, d'un curt doman.

El sol dla fin d'invern a l'ha 'l calor panà come la vista
Dij vej 'nsetà 'nsima ij scalin frust 'd na scala 'd mon.
Mi i-j vardo e scoto. Vurija ambrasseije tuti e fermé 'l temp.

Mi i-j vardo e i-j scoto. Vurija ambrasseije tuti e fermé 'l temp !